

Washirika Kupitia Ahadi za Mungu

Tena kwa hayo ametukirimia ahadi kubwa mno, za thamani, ili kwamba kwa hizo mpate kuwa washirika wa tabia ya Uungu, mkiokolewa na uharibifu uliomo duniani kwa sababu ya tamaa—**2 Petro 1:4.**

Kila ahadi iliyopo katika kitabu cha Mungu hudumisha kwetu ujasiri kwamba tunaweza kuwa washirika wa asili ya Mungu. Hili linawezekana—kumtegemea Mungu, kuliadini Neno Lake, kufanya kazi Zake na hili tunaweza kulifanya pale tunaposhikilia Uungu wa Yesu. Uwezekano huu ni wa maana zaidi kwetu zaidi ya utajiri wote wa dunia. Hakuna kitu chochote duniani kinachoweza kulinganishwa nao. Tunaposhikilia nguvu ile iliyowekwa karibu nasi, tunapokea tumaini lililo imara zaidi kiasi kwamba tunaweza kutumainia kabisa ahadi za Mungu; na tukiing'ang'ania uweza ulio katika Kristo Yesu, tunakuwa wana na binti za Mungu....

Yeye amwaminiye Yesu kwelikweli anafanywa kuwa mshirika wa asili ya Mungu na anakuwa na nguvu ambayo anaweza kuitumia katika majaribu yote. Hataangukia majaribuni wala kuachwa ili ashindwe. Wakati wa majaribio atadai ahadi na kwa hizi ataepuka upotovu ulioko duniani kwa njia ya tamaa....

Ili kutufanya kuwa washiriki wa asili ya Mungu, mbingu ilitoa hazina yake ya gharama kubwa zaidi. Mwana wa Mungu aliweka kando vazi Lake la kifalme na taji ya kifalme na akaja duniani kwetu kama mtoto mdogo. Alijitolea kuishi maisha makamilifu tangu utoto hadi utu uzima. Alijishughulisha na kusimama katika ulimwengu ulioanguka kama mwakilishi wa Baba. Naye angekufa kwa ajili ya jamii iliyopotea. Kazi ya ajabu kiasi gani hii! ... Sijui jinsi ya kuwasilisha hoja hizi; ni za ajabu sana, ajabu mno....

Kwa maisha Yake ya kujitoa mhanga na kifo cha aibu amefanya iwezekane kwetu kuushikilia Uungu Wake na kuepuka uharibifu uliomo duniani kwa njia ya tamaa.... Ikiwa wewe ni mshirika wa asili ya Mungu, siku baada ya siku utakuwa unapata kufaa kwa ajili ya maisha hayo ambayo yanapimwa kulingana na maisha ya Mungu. Siku baada ya siku utasafisha tumaini lako kwa Yesu na kufuata mfano Wake na kukua katika mfano Wake hata utakaposimama mbele Zake ukiwa mkamilifu.